

Protesta Kontra Libertat di Ekspreshon

Nos ta konsiderá libertat di ekspreshon sagrado. Hende ta kla pa protestá ora nan ta sinti ku esaki ta impedí. Ma segun mi, libertat di ekspreshon no ta hasi falta den nos komunidad. Di bèrdat, **tin muchu libertat di ekspreshon** na nos isla.

Un dia mi tabata sinta warda den mi outo stashoná na Kaya Grandi na Playa. Tiendanan no tabata habrí, kaya tabata ketu, ku eksepsyon di sinku mucha hòMBER ku mi a kalkulá tabatin entre 10 pa 15 aña di edat ku tabata kana den direkshon pa nort. Mi a ripará un yùfrou di kisas 20 aña tabata kana bai sùit na mésun banda di kaya. Ora el a nota ku e lo mester topa e chabalitunan, tabata opvio ku el a sinti'è intrankil. Asta su manera di kana a kambia. Nan seis a topa pegá ku mi outo sin sa ku mi ta opservá. E mucha hòMBERNAN a komportá nan...na su kara. Ma mes ora ku nan a pasa e yùfrou nan a kuminsá: “pssss...amor” sigui pa tur klase di vulgaridat, “den bo _____.”

Insidentenan asina ta tuma lugá konstant tur dia. Rèspèt a kaba na nos isla?

Unda e muchanan a siña papia asina. Sin duda nan a tende hende hòMBER mas grandi papia vulgar, i pa mustra ku nan ta tòf ta sigui nan ehèmpel. Skucha konbersashon di hende hòMBER. Algun kasi no por papia un frase sin palabra malu ta skeiru. Pa nan ta un kos di hambresa pa mustra kon vulgar nan por papia. HòMBERNAN no tin rèspèt pa e sekso femenino mas. Sigur nan ta kulpabel di indoktriná e siguiente generashon maskulino pa hasi uso di nan libertat di ekspreshon degenerá.

Ma awendia hende muhé tambe ta kulpabel! Algun ta kompetí pisá ku e sekso maskulino pa gana e premio di vulgaridat, i den algun kaso klaramente ta logra sali kampion!

Ora bo ta di bishita na un kas i e yunan ta papia palabra malu, di bèrguensa e mayornan i ta borotá e muchanan. E bishitante no mester pensa ku nan ta tolerá esei den nan kas. Ma una bes ku e bishita a kaba, e mayornan mes ta papia asina.

Antes bisiñanan a borotá muchanan ku nan a tende papia kos fo'i sla, i a bisa e mama. Awendia, e mama mes lo zundra esun ku bis'è ku un skat di palabra vulgar. A para bira masha normal ku tantu mucha, mayor, i bisiña ta papia palabra malu.

Unda nos ta bai? Dios ta bisa “...no laga inmoralidat òf kualkier sorto di impuresa òf golosidat ni wòrdu mentá mes meimei di boso...ni susedat, ni papiamentu di ko'i loko, ni chansanan bulgar ku no ta pas...” (Efesionan 5:3-4). Beibel tambe ta laga sa ku “...hende lo duna kuenta den e dia di huisio di kada palabra bano ku nan papia” (Mateo 12:36).

Kiko ta motibu pa palabranan fo'i sla? 1) Ta falta di inteligensia—nan vokabulario ta tan limitá ku nan ni por ekspresá nan mes sin vulgaridat kada salta palabra? Of 2) ta ke mes nan ke papia asina? Segun mi opservashon, hende ku ta papia tan mahos por papia desente **si e ke**. Hopi hende ku ta usa palabra malu, sabiendo ku mi ta pastor, ta papia masha nèchi ku mi, òf sikiera ta bisa “despensa na bo kara” promé ku nan usa un palabra desagradabel. Esei ta mustra kla ku **nan por** keda sin papia fo'i sla, ku nan por kambia. **Ta ke mes nan no ke**.

Ta tempu pa pone paro na porkeria verbal. Ta tempu pa stòp di tolerá palabra malu na fèlt di bala, riba kaya, den bario, na kas ...si na kas! Mayornan mester siña nan yunan papia desente. Ma nan no por hasi esei si nan mes no ta un bon ehèmpel...tur ora. Nos mester gradisí esnan ku ta hala atenshon di nos yunan ora nan ta papia kos fo'i sla na lugá di tuma nan na malu.

Libertat di ekspreshon ta bon. Ma desensia ta limitá kiko bo por ekspresá. Nos a surpasá e límite ei masha dia. P'esei nos ta protestá kontra e demasiado libertat di ekspreshon di vulgaridat ku ta reina den nos komunidad.